



17349

I

Mag. St. Dr. P

manca

Orlando - a. 1616 habita.

PANEG. et VITAE

Polon. 4^o

№ 1040.

Biblioteka Jagiellońska



stdr0000371

599

ORATIO
AB ELOQVENTIÆ PROFESSORE
RECENTI EAQVE INSIGNI LIBERALITATE
PER ILLVSTRISS: ET REVERENDISS:
GLORIOSISSIMÆ RECORDATIONIS

D. PETRVM TYLICKI
EPISCOPVM CRACOVIENSEM
MATRI SVÆ BENIGNISS. ACAD: CRAC.
&

GENEROSÆ IVENTVTI POLONÆ,
QVÆ IN SPÆM PATRIÆ ET ECCLESIAE DEI CRESCERET,
PERPETVIS TEMPORIBVS DONATO
ET INSERTO:

Interim M. SIMONE HALICIO MAIO: COLL: PROFES.
A. D. M. DC. XVI. DIE CÆCILIAE VIRGINI
& MARTYRI SACRO:

FREQVENTISSIMIS IISQ; ORNATISSIMIS AVDITORIBVS
IN DOMO MAGNI REGIS

WLADISLAI IAGELLONIS
IN LECTORIO DD. THEOLOGORVM
HABITA.

599. CRACOVIAE, In Typogr. Lazari, apud Matt: Andreouien.
Anno Domini, 1617.

SYMBOLA ECCLESIAE CRACOVIENSIS.



BIBLIOTHECA
VNIV. IAGELLONICAE
CRACOVIENSIS

17349 I

BIBLIOTH. UNIV.
GELLONICAE

Romanum obtuitus Cyneas aliquando Senatum,
Compositum dixit Regibus esse viris.
Hæc est ô Patres vestri quoque forma Senatus :
Quisquis non credis, regia signa vide.

IOANNES SIENIENSKI.
Eloqu : Stud.



Amplissimo & Rndissimo
CATHEDRALIS
ECCLESIAE CRACOVIAN.
CAPITULO.

DOMINIS D. & PATRONIS
SVIS OPTIMIS.

M. SIMON HALICIUS S. P.



IN Vestrae fidei atque sapientiae autoritate;
VIRI AMPLISS: posuit Oratori suo praesidium
dignus qui nunquam moreretur TYLICIVS. Hac erat
qua rerum vsu, qua disciplinarum Sole percocti iudicii
praecleara de augustissimo CRACOVIANSI CA-
PITULO sententia. Accepistis boni & sapientis Epi-
scopi honorificum ordini Vestro testimonium & affectum. Nempe stimu-
lus erat VOBIS magnus & perquam honestus, ipsa in ACADEMIAM
CRACOVIANSEM, & civiles istas in ea literas, propensissima volun-
tas. Et quis hoc non collegerit, vel ex illius inusitatae diei claritate, quo mea
professionis initia dignitatis Vestrae splendore illustrasti? Illa enim lectissi-
morum hominum undique confluens frequentia, illi animi in vota, preces,
laudationes amantissimi Reipub: Senatoris TYLICII soluti, VOBIS
tanquam propositus ad imitandum spectatissimis exemplis sunt attribuendi.
Quo enim se principum virorum fauor inclinat, eo cetera sequi solet mul-
tudo. Tulistis repente facti Oratori, quae Vestra fuit humanitas, infantia:
quid mirum si incidentes audientium nubeculae ex Vestri vultus amoenissima

iucunditate capiebant serenitatem? Meriti res ista non fuit mei: sed in TY-
LICIVM, & in elegantioris disciplina studia constantissimi amoris & fa-
uoris argumentum. Quod etsi solum vera laudis immortalitatem afferat vi-
ris summo loco positus: ego tamen hanc egregiam animi significationem in
ACADEMIAM nostram, beneficii maximi loco numero. Atq; cum
turpe existimem, eloquentiae Professore velle silentio gratum videri: cum
illis ipsis primitiis quarum spectatores & approbatores fuisset ad VOS PA-
TRONOS meos magnos venio. Ita suaserunt amici; ita voluit meorum
Maiorum auctoritas: ut & beneficii TYLICIANI, & mei erga VOS
cultus deuotissimi aliquod, etiam apud eos qui victuri sunt, extaret vestigiū.
Scio ferax esse Aristarchorum istud seculum, praesertim in eam artem, cuius
est infelicitatis, omnium audire & coquere iudicia. Apelli enim licet dicere:
Nesutor ultra crepidam: at CICERO ipse vel Demosthenes cuiusuis
liberorem ex plebe admonitionem ferre debet. In causa est, quod de aliorū
operis eius tantummodò artis periti iudicare solent: in Oratoris opus etiam
inconstantissimi vulgus extendit imperium. Nec tamen ideo concido ani-
mo: ea est enim nominis vestri maiestas & amplitudo, ut eam nullus diffi-
dens sibi liuor, nullaque improbitatis insania audeat appetere. Sub huius pa-
trocinium ego cum isto primigenio confugio, quaq; possum animi summissi-
one à VOBLIS VIRI AMPLISSIMI peto, ut quem semel tuendum
atq; ornandum suscepistis; eum à Vestra beneuolentia portu securissimo no-
litis excludere. Fateor, ut est natura principiorum, hac quoq; mea esse ru-
diuscula: at pro Vestra facilitate atque prudentia, etiam simplici Orationis
cultu vestitum TYLICIVM splendere putabitis: memores & in agresti
laciniā angustio rem animi habitum bene apparere. Viuet hoc in me cum ca-
eteris Vestris singularibus beneficiis, quae ego reuerenti obsequio & memoriā
colere statui sempiternā. Data Crac: ex Collegio Maiorum Professorū.
VIII. Calend. Maij. Anni 1617.

ORATIO.



ECISSET vtinam supremus ille rerum
omnium effector & moderator Deus,
AUDITORES: vt præsentem potius
in hoc vestro confessu amplissimo, sa-
cerdos Episcopum, Academicus Can-
cellarium, opinione eloquentiæ cōmendatus, virum
dicendi laude præstantissimum, solennibus gratiis ex-
ciperem: & non ereptæ ex oculis augustissimæ virtu-
ti, ac singulari in nos beneuolentiæ, tam sollicitè iu-
stissimum gratæ recordationis obsequiū quærerem.
Quod enim optandum erat maximè, quodq; vnū ad
splendorem & dignitatem ordinis Academici, & am-
plissimæ huius Reipub: proprium ornamentum per-
tinebat: id optimi Antistitis diuina virtus, altiori
quodam consilio excitata, summâ cum voluptate o-
mnium nostrūm perfecisse videtur. Mirabamur quid
esset, quòd in tantâ Philosophorum, Iureperitorum,
Theologorū, & cæterorum clarissimorum virorum
copiâ, quorum eruditio & virtus incurrit in lucem
omnium: iam Principes è Rep: viri, iam nobilissimi
quiq; ex loco equestri, vel veterem quærerēt, vel mo-
dernis temporibus commodiorē expeterent Acade-

miam. Nullus iam his sermonibus relictus est locus,
sublata omnis cōquerendi occasio: postquā admira-
bilis TYLICII sapiētia, & viro magnifico digna libe-
ralitas, vniuersam Polonorū ciuitatē ad benē sperādū
ita vehemēter excitauit. Cū enim acutissimē perspi-
ceret animus ille, & pręstantissimarū scientiarū copiā
refertus, & plurimo rerum maximarū vsu perpolitus;
rudem & indoctum ciuem haberi in Polonia: quan-
tumuis celeriter inueniat, vel acriter videat, aut sub-
tiliter distinguat, nisi sub lingua & calamo fuerit (vt
dicitur) Mercurius: Eam pręterea esse temporū con-
ditionem, vt ibi maximē impendatur labor & peri-
culum, vnde emolumentum atq; honos speretur: no-
uā & antehac nostrę tenuitati inauditā pręmij ma-
gnitudine, ad publicum decus excitare voluit virtutē
in arte dicendi peritorum. Effudit benignissimum
suarum fortunarum sinum in Academiam; vt quā in
lāguorem & obscuritatem ire dicebatur, occurreret
procreatrici olim suę charissimę gratissimus filius:
& seminarium vtriusq; Reipub: earum literarum, quę
ciuem liberaliter, sacerdotē piē instituerent, optimus
ipse Ciuis, & Sacerdos confirmaret. Sic iam nouā di-
fertissimorum virorum accessione gloriabitur Aca-
demia:

demia: & nobilioris iuventutis flos, domi, forisque
publicam rem faciet splendidiorem. Huius tam ex-
cellentis boni primo fructu, vel aliquo solum grati
animi testimonio, vtinam illam mentem adeo ex-
cellam & beneficam in hoc vestro conspectu iucun-
dissimo præsentem recreassemus: adhuc benigniori
diuinę bonitatis oculo res nostras aspici crederemus.
Nunc inter tot tamque graua viri post hominum
memoriam laudatissimi desideria, quæ potest à me
par inueniri oratio? Tantum enim pietatis ardo-
rem, tam inusitatum atque incredibile propagandę
religionis Catholicę studiũ, tam insignem quotan-
nis in egenos beneficentiam, tam raram in maxi-
mis negotiis cum dignitate Reipub: agendis dexte-
ritatem, in summis honoribus moderationem, tam
denique incredibilem sapientiam, animi magnitu-
dinem, quæ orationis vbertas, quæue tam fælix
verborum copia, aut dicendi maiestas, vel imitari
conabitur? Crediderim ego pleniora magnorum in-
geniorum flumina, in explicandis præstantissimis
huius viri actionibus suam ariditatem deploratura;
licet toto vitæ suæ tempore, pertinaci studio, & con-
tinuâ scribendi agendiq; exercitatione ad eloquen-
tiæ fa-

tiæ fastigium euadere contenderint. Mihi vero repente ex Philosophorum tabernaculis, in istum dignitatis vestræ solem venienti : cum tantâ noui oratoris expectatione, cum adeò graui iudicijs eruditissimorum virorum respondendi necessitate, quanto periculo dicendum sit, rectè intelligo. Silere quomodo possum, vbi video tot in me oculos & ora cōijci : & quod maius est, Academiam meritorum pulchritudine superari ? Audere non audeo, audendi enim facultatem terret certissima insolentiæ suspicio. Sed vocet quis vel inconsultam rationem, vel si malit crassiori verbo, temeritatem : quòd cogitem aliquid de tam sublimi argumento apud viros adeò limati, & perfecti iudicij dicere : ego eius opinioni non repugno, illud profiteor, me in quoduis horum incidere, quàm sordidæ ingratitude suspicionem dare, vel maiorum voluntati non parere maluisse. Quid ita obsecro inhumanum, immane, aut ferum potest existimari, quàm sponte occurrentem optimi Principis liberalitatem non excipere ? vel quid ita impium, aut nefarium, quàm ab eorum mentibus diffidere ; quos vitæ, commodorum, ornamentorūq; omnium autores, & amplificatores habueris ? Sumo igitur

mo igitur, Patres mei, vestrâ incitatus voluntate,
armatus autoritate, hanc Oratoris excellentē per-
sonam: populari quidem opinione splendidam, at
eruditorum sententijs laboriosam. Recipio nutus,
arbitria, voluntates omnium: nihil iam dico de in-
genij aut valetudinis meæ imbecillitate: non que-
ror de exercitationis in dicendo diuturnâ intermis-
sione; non affero deniq; incredibile latendi potius,
quàm ad aliquam hominum famam profluendi
desiderium: feror totus in admirationem heroici
in optimas literas animi Maximi TY LICII. Vestra
me adolescentem singularis excepit humanitas,
vestra iuuenem formavit disciplina: vos virum for-
tunis, honoribus, & quidquid maximum vobis
erat ornâstis: vester in celebrandâ atq; propagandâ
illustri voluntate clarissimi istius Senatoris, quan-
tus quantus sum, esse volo. Crescit animus ex his
Cracouiensis Ecclesiæ splendidissimis luminibus,
ex hac pulcherrimâ Episcoporum atque Senatorum
origine, quæ me à vobis acceptum in hoc honestis-
simo loco, benevolentissimis suffragijs, atque ho-
norificentissimis testimonijs confirmavit, & illu-
stravit. Apud hos viros, quorum ita singularem

B

perspi-

perspicio beneuolentiam: quique vt alias virtutes
sui Episcopi, ita pium in Academiam affectum ar-
dentissimè cupiūt exprimere: quid ego potero di-
cere, quod illorum aures perhorrescant? si omnes
de amico, vel patrono quantumuis rudes, & inua-
ues narrationes; politæ, & iucundæ vidētur aman-
tibus. Hoc vnum oro, ne interim à me illam re-
rum gestarum celebritatem exegeritis, quam po-
steritas alat, æternitas intueatur, quæq; orationis
maiestate exterarum gētium aures & animos con-
trectet: hoc enim neq; vnius horæ angustijs, nec in
istis nascētis eloquentiæ principijs potest explicari.
Date id potius crescentibus ingenijs, inualescen-
ti orationis vi, florentibus breui tempore bonis
oratoribus: qui vltra huius amplissimi imperij
terminos, vltra florentissimos alios populos diffun-
dent fragrantissimum gloriæ TYLICIANÆ odorem,
Nos interim gratiæ referendæ sumamus exordium
ab admiratione magnitudinis animi illius, cū in
alijs egregiè factis; cū in hac artis dicendi in Aca-
demiâ nostrâ splendidiori collocatione. Non pu-
to indignam fore Vestris auribus materiam, qui
recordatione charissimi capitis Vestri nihil habe-
tis iu-

tis iucundius: quiq; in istà sublimioris vitæ dignitate collocati nihil ijs literis quas amavit TYLICIVS, geritis expressius. Velitis modò istis beneuolentiæ indicibus, luminibus (inquam) oculorum Vestrorum serenissimis, meæ orationis temperare navigationem; per ipsam Vos bonitatem, & istius Vestræ dignitatis pulcherrimū decus obtestor, & oro.

Solent sæpenumero eloquentiæ laude præstantes viri, principia suarum laudationum virtuti generis, robori, formæ, dignitati, amicorum claritati ac multitudini, & si quæ alia in precio habentur consecrare: omnemq; maiorem dicendi vim in huiusmodi rebus cōmemorandis cum quadā præstantioris ingenij ostentatione explicare: Res enim domi forisq; gestas, fortissimorum ciuium, potentissimorum Regum, sapientissimorum Imperatorum, omne deniq; decus ac dignitatem fortunatissimarum Rerumpub: ab hoc vno oriri principio, ex communi omnium populorum consensu, & diuturnis hominū moribus optimè didicerūt. Mitamus peregrina; nostra hæc Patria nunquam ex rebus bellicis & ciuilibus tantā collegisset gloriam, nisi à parentibus nobilissimis, cum sanguine instil-

B. 2 lata,

lata, & à diuinis laudum præconibus excitata generosi cuiusq; virtus : primam illam lucem, splendidissimo factorum lumine propagare atq; cohonestare pulchrū existimasset. Dum verò audiunt magnā indole præditi adolescentes, se non tam fortunarum, quàm actionum clarissimorū progenitorum hæredes esse debere : nihilque ita probro haberi, vt inter tot spectatissimas maiorū imagines degenerē esse : legem sibi indicunt innocentiae, continentiae, virtutumque omnium : neq; iam solū honestè, sed & gloriose cum præstantiā aliorum laudatissimorum virorum viuere desiderant. Quid mirū, si omnes boni nobilitati generis fauent, & in eā ornandā tantum studij aut operæ collocant : si nemo hæc præclara siue naturæ, siue fortunæ ornāmēta ; nisi improbus, & apertè insanus sit, contemnat ? Magnum sanè est nobili loco oriūdum esse : sed tamen sunt alia longè maiora. Nam generis clari amplitudinem ; multi etiam nobilissimorum Philosophorum solent extenuare verbis, eamq; detrahare posteritati : quòd maximè ridiculum sit, in homine laudare aliena, & quæ in alium etiam sceleratissimum transferri possunt. At verò maiori quodam
splen-

splendore animi conspici, ad dignitatem referre omnia, sine quâ nihil vnquam homini libero est expetendum in vitâ, præsentis fructus negligere, posteritati & gloriæ seruire, id optimum, quod rectissimum sit, putare, corpus hoc ex elementis corruptioni continuè obnoxijis cōpositum, etiam maximorum Principum esse mortale, animi verò motum, & virtutis gloriam immortalem cogitare; hoc demùm est sapere, frui anima, & gloriosæ vitæ altissimas radices agere, cuius laurea nullâ temporum diuturnitate suam est amissura viriditatem. His multò insignioribus bonis, cùm vsq; in admirationem venerit noster TYLICIVS, non miremur in eo illa, quæ vel alienæ innituntur gloriæ, vel in ipso externo splendore consistunt. Frustra enim corporis quærentur simulachra, vbi insignis aliqua imago animi apparuit. Quis dubitet eum generosissimis ortum maioribus, in quo tam singularia ad vitam cum dignitate agendam præsidia extiterunt? quique propriâ virtute ac industriâ perfecit; ut cùm esset nobilissimi equitis filius, summâ honoris amplitudine, in Regno hoc, viris fortissimis & sapientissimis florentissimo, & grauiissimi Se-

natus auctoritate, & Regum gloriosissimorum iudicijs dignus putaretur. Omittamus igitur de genere dicere, quod & recentissimorum hominum sermo, & annalium vetustas probat fuisse semper domesticâ laude celebratissimum. Illud potius augustioris animi decus, illam mentis excelsitatem, quæ se amplissimo quoque honore dignam existimat, intueamur. Hæc enim, vt cæterarum omnium virtutum splendidissimum ornamentum, & quasi pulcherrima varijs ijsque preciosissimis honestatis vnionibus insignita corona, effulsit in capite summi istius ad conseruandam Rempubl: nati hominis. Nam vt primùm intellexit è viris in Rep: primarijs, rarissimas illas ingenij & eruditionis opes, quas Deus præpotens ad iuuandos & tutandos alios in se liberaliter effuderat, summo honore dignas cēseri: magno & forti animo cōtempnit caduca hæc & fragilia puerilibusque consentanea crepundijs bona: cumque posset ociosam, & quietam ætatem, sine vlllo labore & contentione traducere, maluit laboribus, vigiliis, periculis, vitæ deniq; ipsius dimicatione ad summam laudē contendere. Illum verò inprimis suarum contentio-

num

num spectatorem esse cupiebat, à quo in hanc stationem vitæ, cum excellentissimis & ingenij & animi facultatibus missus est: vt eum propagatione boni communis imitando, pio gratitudinis cultu veneraretur. Ita cæteri optimorū factorum exemplo, ad similem venerationis ardorem excitabantur; ipsa verò gratissima posteritatis memoria, in cuius etiam nunc iucūdiSSimâ luce felicissimus quiescit, sponte sequebatur. Erat illi & alia in Rempubicam veniendi occasio. Videbat fortè vitium contra virtutem ferri vehementiori quodam impetu, pluresque communem sibi administrationem arrogare, qui diuitias, voluptatem, honores, saluti & dignitati vniuersorum præponerent: bonos ciues cunctatione, & tarditate sua, de integritate, & splendore publico aliquantulum deterere. Itaque ne improbitas timore laudis falsissimæ insolesceret, aut virtus suam æstimationem amitteret; accessit ad latus sapientissimorum & optimorum ciuitatis custodum, vt arte regendi hanc magnam nauem melius instructus, ostenderet instar periti artificis cæteris ineptè ambientibus, vel vti ignorantibus: quis esset vltus, conditio, studium, pondus,

duſ, auctoritas, ciuis in Rep. Cæterum quia ſciebat
honorem eſſe externum ſignum excellentis alicuius
probitatis; non exiſtimauit properandum eſſe
ad præmia, quæ non niſi bene cognitæ, maturæq;
virtuti debentur: ne fortè leuiſſimo gloriæ vento
inflatus, ardorem in patriam extingueret, ſitiq;ue
ante debitum tempus expletâ, priùs ſaſtidire, quàm
eſurire verum decus condiſceret. Grauiori iam &
constantiori ætate, poſt numerata in bellis ſtipen-
dia, poſt depositum glorioſe fortitudinis apud ma-
gnos imperatores balteum, deniq; poſt deditum &
conſecratum ipſi Deo animum, inflammatus ar-
dentiore quodam ſtudio ad proſequendum honeſtū,
ingreſſus eſt in Remp: vt aliquo præmio quaſi pigno-
re obligatus, faceret ſuæ virtuti aditum ad immor-
talitatem. Nec diu id fuit expectandum: magnus
enim Rex STEPHANVS, vt erat virorum ſpeculator
diligentiſſimus, ſtatim illud ingenij & iudicij ſplēdi-
dioris lumen aſpexit, atque in proximo ad ſummos
honores aditu virum poſuit, magniq; Secretarij Re-
gni honorificentiſſimo munere cohoneſtauit. Quo
cōfirmatum nobiliſſimum pectus, hoc vnum age-
re, cogitare, moliri, ſomniare cœpit: vt illuſtrio-
ribus

ribus quotidie factis opinionē de se cōceptam vin-
ceret. Amare Patriam vehementiūs, Regem colere
illustriūs, vberiore Senatu spem polliceri, multi-
tudinis oculos acriores in se vertere, sui putauit esse
officij. Iam illis animorū pabuli depopulatricibus,
quæ nostram primam patriam, hoc est, mētis bona
comedunt, rationem exuunt, lumen iudicij excæ-
cant, ne aspectum quidem ex longiori loco cōce-
dit: & quorum venena nouerat non attigerat, eo-
rum etiam nomen detestatur & perhorrescit. Fre-
quens in ore ipsius erat vox: Currēti ad gloriā im-
petu honesto, nihil debere esse cōmercij cum lan-
guore mentis, aut aliqua corporis oblectatione; ni-
hil cum intemperantiā ei, qui arcana nō Cereris E-
leusinae, sed amplissimæ Polonorum Reipub: cōn-
credita haberet. Atque vt Pericles Atheniensium
toties purpuratum honorem cōcutiens in memo-
riam publici decōris veniebat: ita TYLICIVS pri-
mam illam honoris imaginem studiosè contem-
platus, admonebatur, ne quid citra dignitatem fa-
ceret: imò excitabatur, vt pro eā illustrandā, tueri
libertatem, salutem, vitam ciuium non desisteret.
Iudicio maximi prædecessoris sui commendatam,

C

& sibi

& sibi in rebus difficilimis cognitam virtutem
complexus SIGISMVNDVS Rex, altiori loco di-
gnam iudicat: quæ in grauiſſimo & moleſtiſſimo
Secretarij munere, tantam ſibi apud omnes bene-
uolentiam, laudem, admirationem pepererat. Vo-
catur itaq; cum luculentâ meritorum ſuorum cõ-
mẽdatione, aut potiùs trahitur inuitus in amplio-
rem bene merendi campum, in Senatoriẽ nimirũ
dignitatis auguſtiſſimum Collegium: renuncia-
tur Culmenſis Epicoꝝ: fit ingens omnis gene-
ris, ordinis hominum plauſus; & acclamatio. Quæ
tum animo illi fax appoſita? quæ cogitatio ſan-
ctioris vitæ iniecta? quiſtimuli ad maiorem glo-
riam expulcherrimis in Rep: actionibus compa-
randam ſubditi? Eſt quidem ſplendidiffimum,
virtuti, fidei, feliçitati alicuius commendari Remp:
at curis, ſolicitudinibus, moleſtijs, obtreçtationi-
bus vulgi, calamitatibus, pleniffimum, vt Senator
Romanus, magnificum imperij nomen, & ſuper-
bam pompam liçtorum, paruis aliquando Italiæ
latebris optaret commutare. Quid in Eccleſiẽ ſpe-
culâ conſtitui? quàm periculoſum? præſertim in
eâ, in quâ tot fortes & magni viri rerum maxima-

rum

rum principia cum tot difficultatibus posuerunt. Magno hîc animo fuit opus ingredienti ad summos honores: exerit eum vir fortissimus. Omnium suorum consiliorum & actionum exempla, ex summorum inprimis hominum factis censet esse petenda; pietatis, iustitiæ, fortitudinis, prudentiæ, amoris ciuium, in magnâ fortunâ humanitatis; & aliarum virtutum, non se iam cultorem, aut amatorem profitetur; at custodem, vindicem, propugnatorem, fidelissimum, acerrimum, constantissimum protestatur: vt suo exemplo, ciues in maximis opibus continentiam, in summis honoribus legum æqualitatem colant, discantq; comprimendas esse libidines, extirpandam lucri cupiditatem, pellendam luxuriam, ponendas simultates, donandas inimicitias, vt sancta seruetur Reipub. societas. Videt & cum Episcopatus honore venisse nouum angorem vigilantia, atq; custodia ciuium, non Romanorum aut Atheniensium; at splendidissimæ illius Hierusalem adscribendorum ciuitati: quos ipse summus mundi Princeps proprio quæsiuit sanguine. Hîc iam vitium est non esse optimum, vitæ innocentia & doctrinæ

præstantiâ non lucere, impium : propriâ potiùs
lucra, quàm ea quæ Christi sunt, per suscepti mu-
neris gratiam consecrari, sacrilegium. Neque hîc
animo cadit, multùm sibi de illius gratiâ, qui vir-
tutes excellentiores ex infirmitate nouit produce-
re, pollicitus : tuetur se, domumq; suam ab omni
peccati labe : humilitatis profundius iacit funda-
menta, amoris ignem in Deum, in gregem colligit
luculentiorē. Nec satis putat morum sanctitate,
sapientiæ splendore, commissas oues ad virtutem
incitare, aut maculas, vlcera, contagia, summâ
diligentiâ tollere ; imponit sibi necessitatem per-
petuò in omni honestate atq; virtute proficiendi,
neq; propositâ etiam poenâ, inuidiâ, morte, ab eo,
quod omnium salutem, Ecclesiæ dignitatem, Dei
gloriam spectet, recedendi. Quæ omnia mox in
vitæ eius actionibus pulcherrimè effulserunt : nam
& domestici beatissimos se fore putabant, si secum
quàm diutissimè commoraretur, & proximi piâ
æmulatione, tam bonum Episcopum Culmæ in-
uidebāt. Non enim Ecclesia ab eo quidquam desi-
derauit, non senatoria dignitas vllâ re diminuta
aut obscurata est : gaudebat Cathedra Episcopo,
clerus

clerus patrono: nobilitas, vniuersaq; Culmensium
prouincia, tam fidelem, diligētem, benignum præ-
sulem venerabatur. Sola religionis nouæ impo-
storum turba ingenti animi metu trepidabat, ne for-
tè auersam nuper callidissimis insidijs nobilissimam
prædam, turpissimè dimittere cogeretur. Neq;
hic metus illius erat inanis: vt enim in aspectum
pastoris venit insolitus Ecclesiarum squalor; iniuri-
arum contumeliarumq; à furiosissimis hominibus
illatarum magnitudo: consurrexit iusto dolore cō-
citatus animus, perq; omnes aduersariorum dolos
& fraudes viam sibi muniuit ad gloriosos ex li-
bertatis Ecclesiasticæ vindicatione triumphos. Im-
mittit primùm acerrimi ingenij lectissimos iuue-
nes in seminaria, artibus, exercitationibusq; pie-
tatis, continentiae, diuinarum literarum, instru-
ctissima: quos deinde confirmatos & bene exerci-
tos per diuersos Episcopæ suæ locos in excubijs &
statione collocaret. Ipse interim acceptis aliquot
veteranorum turmis, ex proximo quoq; doctissi-
morum Theologorum Collegio, iustum bellum
in pace suspectâ quærit: mores, vitam, religionis
puritatem lustrat diligentissimè per suam diœce-

sim. Vix hostis aduentantem subodoratus est, fugit
in densissimas tenebrarum Saxonicarum siluas: de-
speratâ latibulorum, spoliôrũq; recuperatione. De-
seruntur belluarum immanissimarum spelæa, relin-
quuntur tēpla nostrorum, fædissimo (proh dolor)
contagio deformata: vincitur temeritas, cadit per-
fidia, fugatur improbitas, dissipatur impietas, liga-
tur conuulsio, infirmitas sanatur. Quid multis?
propè sexaginta fana nobilissima vno aduentu atq;
aspectu tulit gloriosus victor ab iniustis possesso-
ribus, sine cæde & sanguine: solâ animi prudentiâ,
constantiâ, legum iudiciôrũq; autoritate confir-
matus. Iuerunt captiux in triũpho antiquis O-
pibus & potentiâ superbæ ciuitates: quæ frustra
paulò antè occupatas, peramplas & dote grandi o-
pulentas basilicas (insignia piorum Catholicorum
maiorum suorum monumenta) summâ vi & con-
tentione retinere voluerunt. Recepta veteribus do-
minis omnia, datum insuper ius domicilij religio-
sissimis hominibus, inductum pastoris officium, po-
testas docendæ plebis reuocata, Sacramentorum
administratio, & alia sanctissimæ fidei nutrimen-
ta liberè proposita, summâ cum admiratione, imò
ipso-

ipforum ob datas manus maximo pudore populo-
rum. Abite superbæ gentilium oleastri, cedit la-
rorum aut apiorum viridantia folia, vilescant om-
nes quantumuis magnifici, quantumuis splendidi
equorum, curruum, ordinumq; variorum appa-
tus: rideris & tu effusa ex vrbibus in gratulationes
triumphatorū multitudo. Animę hīc diuinā splen-
dentes immortalitate in opimis spolijs habentur,
non corporum fragilitas brutis animantibus com-
munis. Sacerdos summi verique Dei inuehitur ful-
genti ardentissimæ charitatis curru, non aliquis
Fabius aut Scipio, eboris aut auri opinione stultis-
simè fasciatus: purpuratam gerit hic frōtem pre-
ciosissimo Filij Dei sanguine; non vilissimi ebuli
baccis aut minio fallacissimo nitentem: iugum est
trium equorum generosissimorum, Dei, Ecclesiæ,
Patriæ amor, non vnus ignauissimus caballus, cu-
ius nomen ingratissimum SIBI sanctam vbiq; dis-
soluit societatem: spectatores, ductores, gratula-
tores sunt potentissimæ ac sapientissimæ beatarū
mentium legiones; non ignobilis vulgi sine pon-
dere numerus. Fælices captiui, qui ad vitæ dignio-
ris libertatem præmijs amplissimis inuitantur. non
angu-

angustissimis compedibus trahuntur ad barbaricæ
seruitutis turpitudinem. His tot tamq; splendidis
altissimarum virtutum exercitijs percussa male-
uolentiæ seu inuidiæ tabes, non iam in omnium
animis liberè, iucundeq; regnanti viro fortissimo,
fumum aut caliginem subijcere, aut insidias potu-
it machinari. Tanta enim illi creuerat dignitas, vt
Regiam voluntatem, & Senatus beneuolentiam in
manu (vt aiunt) haberet; populi inconstantia ni-
hil in TYLICIO honoribus augendo constantius.
Vniuersi enim ex nobilitate, pari animorum con-
sensione sociati, ingrediuntur in curiam: atq; vt vi-
ces Cæcellarij IOANNIS ZAMOSCHII, cuius & quâti
viri? satis dico apud orbē terrarū ZAMOSCHII Cæcel-
larij Episcopus Culmēsis TYLICIVS obiret, prolixa
meritorum ipsius cōmendatione, & summâ dicēdi
vi efficiunt. Munus quidem illustre in Repub. in
cuius tutelâ salus & libertas omnium ciuium con-
tinetur; at ex ipsis molestijs & difficultatibus con-
textū. Quid ita graue, vt ex eo loco prospicere, vn-
de oculis, auribus, studijs summorum, mediorum,
infi. morum seruiendum est? Ille negotia externa
de rebus grauissimis cum Pontifice, cum impera-
tore

tore, cum Regibus, & Principibus maximis inire, tractare, componere, expedire: ille ne aliquam libertatis diminutionem ordo quispiam Reip: patiatur, dispicere: ille Euripum popularis multitudinis in tot affectus identidem assurgentem prudentiâ tenere: ille iudiciorum omnium lites, molestias, contentiones excipere, concoquere, sedare: ille literis supplicatorijs ad Regiam Maiestatem aditum facere; & quibusq; diuersorum hominum postulationibus respondere: Dicam breuiter; Vicecancellarius omnibus debet esse omnia, & singulis singularis. Et tamen in illo negotiorum tumultu, nemo asperiores eius vultum accusauit, nemo de aditu difficiliore conquestus est, nemo acerbius responsum accepit, nemo humanitatem, nemo cōsuetudinem, nemo consilium, nemo deniq; auxiliū requirebat. Regi suo manus, oculus, imò mens fuit, Senatoriæ grauitati insigne decus, nobilitati certissimum perfugium. Iuridicundo, aut causarum cognitioni quoties vacauit, nihil illi fuit alienius præcipiti sententiâ. Cùm enim cor in dextro latere haberet, hoc est, vt historicorū grauiissimus vertit, de omnibus bene sentiret; nonnisi diligen-

ter ponderatis & examinatis factorum circumstan-
tijs, & rationum momentis : vel ad erigendum, vel
ad affligendum quempiam extremo verbo, addu-
cebatur. Videres illam ab antiquis confictam iusti-
tiæ laudatissimam imaginem, cuius caput cælo cō-
debatur : reliquum corpus in terrā fuit demersum.
Quidni enim dicam in cælo caput fuisse diuini hu-
ius viri, qui in consiliorum inquisitione, in senten-
tiarum promulgatione, ipsius Dei præsentissimæ
præsentia cogitatione mouebatur : & ex solius o-
cultæ inspiratione sapientissima proferebat oracula
decretorum ? Relictus erat in terris dimidius ille
homo, quem aliquando varietas perturbationum
solet permiscere : in terris (inquam) fuit relictus,
hoc est, in vilissimi sui ortus & interitus contem-
platione : cumq; intelligeret omnes istas iucundi-
tatum, honorum illecèbras mox abituras, solâ be-
nemeritorum conscientia recreabatur. Nec vlla
esse potuit tanta largitionis machina, quæ in eo in-
tegritatem boni iudicis expugnaret. Qua propter
amantissimus bonorum ciuium Princeps, in omnē
augendæ dignitatis ipsius occasionem intentus :
orbitatem illi Varmiensis Episcopæ commendat,
opulen-

opulentissimam & suo sponso honoratissimam ditionem. Nempe vt reliquam Prussiam zizanijs falsarum religionum, aut paleis remissiorum Catholicorum, fœlicissimus ei rei Episcopus perpurgaret. Esse in viro prudentiam, vt sciret: bonitatem vt vellet: auctoritatem, vt posset licentiùs grassantem audaciam comprimere aut perdomare. Quid ageret, qui semel omnibus periculis se pro Christi hæreditate deuouerat: quiq; benignissimo Regi in re tam iusta non obtemperare, sceleris loco ducebat? Iuit iterum aduersus pestiferæ doctrinæ profeminatores, nullum sacrificium gratius Deo ratus tali pietate. Si enim ethnici patriæ conseruatoribus, aut amplificatoribus certum ac definitum locum in cælo assignauerunt: quid nos (inquit) sperare debemus, qui pro illa cælestis patriæ amplificatione, sub vexillo potentissimi & nostri amantissimi Imperatoris dimicamus? Ipsum illud æternitatis præmium, ita virtutis amplitudinem propagauerat, ita accessions gratiæ Dei certum reddiderat, vt crederet, etiam sedendo irruentes grauissimas calamitates se posse repellere. Neque huiusmodi spe vnquam excidit, qui Reipubl: curam cum Ec-

clesiæ studio, tam sapienter attemperauerat: ut
cum huius magnam rationem duceret, illam non
negligeret: quantoque dignitas Ecclesiastica omni
fulgore sæculari præstantior est, tantò illius quoque
grauiores duxit habendam esse sollicitudinem.
Hic ego non cōmemoro arctiora ieiunia, feruen-
torem orationem, longiores vigilias, humilita-
tem cum magnitudine animi mirabiliter copula-
tam, susceptam pupillorum curam, sumptus in di-
uerforum Collegiorum, Academiarum adolescen-
tes, factos, religiosorum hominum charitatem,
nouâ quotidie sui Episcopi liberalitate recreatam:
& alia innumera beneficentiæ exempla, quibus
fælix Varmia suos pascebat oculos, & quorum il-
le possessionem quasi hæreditariam, usque ad extre-
mum vitæ spiritum sibi reseruauerat. Quamobrem
Varmienses nihil optabant ardentius, atque Tylicianâ
prouidentia cōtineri, illiusque iucundissimo vultu per-
petuò recreari. At eâ voluptatē intercipiebant fre-
quentissima Regni negotia, quibus ille expedien-
dis penes curiam Principis præsens esse debuit.
Grauis illi tum cœpit esse Vicecancellariatus: non
quòd publici laboris molestiam defugeret; at quia
suos

suos aspiciebat, incredibili sui desiderio fatigatus, quòdque timeret multum, ne in illà luporum vicinià ouis aliqua periret, aut inficeretur. Itaque post redutum iterum fæliciter è patrio regno SIGISMVNDVM TERTIVM Dominum nostrum Clementissimum, post expeditā grauioribus negotijs Remp. missionē petere à curia, fidei Symbolum à Rep. commissum, in eiusdem sinum reponere instituit. Cæterum inanis hæc fuit cogitatio. Rex enim collecto ex diuturna fidelissimi comitis consuetudine affectu maiori, statuit eum in proximis habere: ut ex illius diuite iudicij penu, salutaria Reipub. consilia incurrente necessitate depromeret. Fert occasio Episcopatum Vladislauensem, proximam primæ in Regno Poloniae, & opum copiā, & honoris splendore, & loci autoritate, sacerdotij dignitatem: illustrat bonus Princeps suam in virum, & in præclarè de Rep. merentes, voluntatem. Magno quidem ista constabant apud eum, qui hæc nondum penitus spreuerat: TYLICIVS solā meritum suorum gratitudine oblectatus, quasi verò & excellenti bono: paret auctoritati Regiæ, obsequitur voluntati Senatus, & reliquum sanguinem, curis iam & solici-

tudinibus grauissimis ferè congelatum, pro patriæ salute, magnâ cum animi sui testificatione pollicetur. Vnum tantummodò obtecrat, vt sibi liceat iam ex illo loco in maiorem patriam, vbi veriores honores, amplioraq; præmia decernuntur, euolare. Ipsius Ecclesiæ curâ susceptâ, ea primum aggreditur, quæ fortes Rozrazouij, Tarnauij, & cæteri huiusmodi viri maximis susceptis laboribus attentârunt. Neque ignorabat; pulchrè res magnas ordiri, & impetu quodam ad incrementa contendere, multorum esse: proposita verò ad finem deducere, & sicubi fortuna vel potentum improbitas obstiterit, ratione, iudicio, consilio, animi fortitudine superare, paucorum: nihilominus pro sanctissimis Ecclesiæ legibus, pro inflammata in cultum Dei piorum hominum voluntate, ausus est potentissimos aduersarios in certamen prouocare. Quod si diuina sapientia, gloriam hanc non seruasset aliorum laboribus, non eam reliquisset inchoatam. Spectatum verò tatis & probatum, quasi statuam tot victorijs nobilissimis honoratam, in altiorem dignitatis gradum erigere decreuerat: vt multò plures haberet suarum ad immortalitatem

conten-

cōtentionum admiratores. Cū enim Macieioui-
us Cardinalis, vir animi innocentia, grauitate, con-
stantia singulari, superato clarissimorum maiorum
suorum splendore, in Archiepiscopatum Gnesnen-
sem, hoc est in summam honorum amplitudinis in
Polonia gloriam, à diuinarum virtutū maiestate su-
blatus ascenderet: de Episcopo Cracouiense vix in-
cidit mētio, TYLICIVM omnes cogitant, omnes lo-
quūtur, omnes expetūt: quòd nemo ad illam mo-
rum sanctitatem, amorem ciuium, fortitudinē se-
natoriam, Zelum pro Ecclesia MACIEIOVII propiùs
accederet. Factum ita, cum summa voluptate Re-
gis, qui magis in dies splendenti virtuti sui Episcopi,
quotidie maioribus honoribus optabat gratulari.
Quid? non satis iam gloriæ vixerat? non iustum
pro suis in Rempub: meritis acceperat præmium?
non Episcopatus Cuiaviensis satis commodus, aut
illustris ad amplificandam Reip: dignitatem? Satis
quidem; at quantumuis aliquid amplum sit, id cer-
tè parum est, si quid est amplius. Quid verò am-
plius poterat cogitare animus tam pius, tam gra-
tus: atque illum locum splēdidissimo suæ dignita-
tis lumine illustrare, qui adolescentem liberaliter
educa-

educavit, qui Præsbyterum prima sacerdotij splendidi-
dioris dignitate ornauit? Obuersabantur animo
illius cum gratissima recordatione educatores, atq;
doctores sui in Academia Cracouiensi, domus illæ
sanctissimæ, in quibus olim altus, educatus, doctus
est: suavis erat memoria illius temporis, cum in
Ecclesiam primariam, Diuo STANISLAO Martyre
celebrem, surculus infereretur: veniebant in men-
tem viri admirabiles, quorum ille cōsuetudine iu-
cundissimâ in eodem Collegio fruebatur. Quod si
Deo religionem, parentibus pietatem, bene meritis
gratiam & memorem animum, iustis honoribus,
& honestis officijs persolvere boni ciuis est: si vel-
le ibi cum gratitudine mori, vbi verè natus sis, in
quadam fælicitatis parte numeratur: quanta laus
huic viro debetur, qui reliquam etatem inclinatam
non commoditatibus, nō ocio cum dignitate, sed
negotio, sed labori glorioso destinavit; modò illā
voluntatem gratam, atq; suæ pietatis studium, in
eos quos ita amauit, insigni aliquo testimonio de-
clararet. Accipit ergo Ecclesia Episcopū, quē olim
dimiserat Canonicum; salutatur Academia Cancel-
larium, cuius iam liberalitatem, & patrocinium
in gra-

in grauissimis difficultatibus fidelissimum agnouerat: nobilitas vniuersa magno cum splendore occurrit Pastori, atque suis humeris, suum illum Vicecancellarium intert vrbi, cathedræq; cum honore imponit. Quid me necesse est repetere quibus in Episcopatu Cracouiēsi luminibus, quauē glorię pulchritudine resplenduit? Vt enim sol ingressus in Leonis signum, maximè suos radios explicat, caloreq; vehementiori incendit omnia; ita ille in sublimiore dignitatis fastigio positus, multò maiores virtutis fructus edere; multoq; clarioribus factis illuminare cæpit Diœcesim Cracouiensem: sanè priora illa, quæ incredibilem excitārant omnium admirationem, obscurabantur. Quanta in comitijs dicendi pro integritate Reipub. libertas! quanta in senatu grauitas, imò reuerentia, cū velut Græcorum Nestor, aut Romanorum Arpinas, melle dulciorem, & ipsa sapientiā sapientiozem funderet orationem! Non principis maiestas, non Collegarum amplitudo, non Tribunorum potentia turpe putauit in vnius hominis inclinare sentētiā: quem sciebat vehemēter amare bonum commune & singulari præstare iudicio. Eo præsente nullus in ordi-

E

nem

nem senatorium licentiæ fuit locus, nullus inquietis aut turbulētis hominibus aditus: omnium operarum, molitionumq; occultarū facultas præcludebatur. Quid enim tentaret improbitas, vel audacia eo audiente, cuius iudicij splendor vix oborientes tumultuum nubeculas præuidere, & antevertere, civium procellas aut tempestates populares, scienter componere didicerat: quiq; sui corporis ruinā conservationem Reipub. dignitatisq; consularis auctoritatem, bene emi credebat. Non illum ab innocentia defensione improbitatis vis, non à iustitiæ vindicatione impietatis furor, non ab oppressorum leuatione, licentiæ insolentia reprimebat. Quoties frustra infremuit prauitas hæretica, elusi factionum hominū conatus, præceptę consilio insidiæ, compressa animi magnitudine audacia? Quamobrem Regi gratissimus, ordini suo charus, nobilitati bonarum partium studiosæ, vt verus Pater Patriæ, omni veneratione colendus extitit. Iam in Ecclesia Episcopus, quā integritate vitę, morum comitate, prudentiā? quām deniq; augustiori virtutum choro emicuerit, quām artificiosè, quām iucundè summa humanitas cum seueritate summa

coiue-

coiuerint? Dicebant multi: non abijſſe à Cathedra
Cracouienſi Macieioiij facilitatem: multi boni-
tate illius ſuperati, relictis proſtigatæ vitæ neceſſi-
tatibus, ad eum imitandum totos ſe compoſue-
runt: multi intelligentiæ perſpicaciam non auden-
tes prouocare, excubias, & diligentiam acrem ti-
muerunt. Qui enim annus fuit, quo vel ipſe urbem,
vicos, oppida, ciuitates non circumiret, vel pie-
tate, & doctrinâ inſignes viros mitteret? qui alios
ſuis cohortationibus tenerent in officio, alios con-
ſilijs ſapientiſſimis ad propriam vitæ ſtationem re-
uocarent? Quid illa fulmina ab Eccleſiæ poteſta-
te proiecta? quid gladius ille Petri in media luce ho-
minum diſtrictus agebat, cuius latus aut caput, illa
generoſæ mentis acies in proiectiſſima perditiffi-
morum hominum inſolentia petebat? pro cuius
honore, pro cuius dignitate, religione, aris, focis,
tanta dimicabat contentione? Dignus qui ob vul-
tus maiestatem & reuerentiam non illi multorum
millium interfectori Iulio; ſed ſuo Patrono arden-
tiſſimo iuſtitix propugnatori Diuô Stanislao, aut
fortiſſimo Antiſtiti Zbigneo conferretur: qui in-
territus, & conſtanti animo pedum boni paſtoris

gestare sciuerat. Eius iudicio debet augustissimum
Cracouien: Ecclesiæ Collegium, hunc ordinē pul-
cherrimum, hæc propugnacula, & ornamēta viro-
rum: quorum singulos, ob generis, vitæ, sapientiæ
lumen; infulà & curru senatorio dignissimos iudi-
caueris. Ei acceptos refert Diœcesis tot eruditos,
graues, modestos Ecclesiarū præpositos, tot sacer-
dotes pios, & suæ vocationis diligentissimos obser-
uatores. Petrum suum loquetur ingentis magnitu-
dinis fusa ex argento, & in Ecclesia patronorum Re-
gni collocata Petri Apostoli statua: parietes interiùs
& exteriùs, iam picturis, iam peristromatibus pre-
ciosissimis exornati, pomeria ex quadrato lapide e-
recta, basilicæ dotata, plenæ fornices, plena alta-
ria, arte laborata, & Salomoneo templo dignissima
suppellectili, cultu, vestitu, & quæ diuino officio,
cum quadam maiestate celebrando sunt accōmo-
data. Quem affectum in honorem Dei per plures
locos testatus est insignibus testimonijs. Nempe
vt supremus in aliqua domo paterfamilias abiturus
in longinquam regionem, in liberorum, propin-
quorum, familiæq; vniuersæ animos infigit pro-
fundioremem sui memoriam: ita TYLICIVS magnus

in hac

in hac vrbe, quę est istius Regni præcipua, sacerdos :
post tot honorificentissima donaria Principibus,
collegis, familiaribus, amicis relicta, ferè in omni-
bus primarijs Cathedris, tanquam suis cognatis
singularia nominis sui monumenta deposuit. Nar-
ratur plures certasse vrbes de ortu Homeri, ob in-
genij diuini præstantiam : cur non magis verisimi-
le contentiones facturas, in ornanda TYLICII be-
neficientia præstantissimas Diœceses ? Dicet enim
Gnezna suum ; Poshania suū : Culma, Varmia, quid
non facient ? Mitto Lenciciam, Præmisliam, & alia
illustrium sacerdotum collegia, quę omnia osten-
tant pignus amoris TYLICIANI. Quid superbis
Koualium templi magnificentia, turrium celsitu-
dine, propugnaculorum munitione ? quid reditu
amplo superbis ? opes tui benefactoris iactas ? nutri-
cem te potius dixeris non coniugem, aut sponsam
Tylicianam. Quis explicaret in pupillos & omnis
generis pauperes indefessum beneficentię studi-
um ? Vñtatum fuit singulis annis in eam rem duo-
decim millia florenorum effundere : nec tamen in-
currens necessitas, aut aliorum calamitas, ab illius
bonitatis perfugio frustra dimittebatur. Hic con-

dicti fuerant sumptus templorum erigendorum, re-
ficiendorum, vindicandorum; hinc apertum penu-
re religiosorum ferè omniū, hinc mensa instructa pau-
perum clericorum: utq; Cimonis liberalitas quem-
uis Laconem parato obsonio; sic TYLICII animus
ab omni sorde, & angustia alienissimus, omnes in-
digentes certissimo auxilio excipiebat. Academici
ingenij in petendo verecundiam, cum sciret suo in-
commodo esse modestiorem, prudentissimè no-
stram necessitatem solebat antevertere. Ipsa ruenti-
um auditoriorum fama supplicabat satis, ipsi parie-
tes Collegiorum inclinati ferendam sibi opem e-
gregiè persuadebant. Contubernio pauperum stu-
diosorum antiquæ illi Ithacæ, asperæ quidem & in-
saxis inopiæ pendenti, viris tamen non infæcundæ;
ille, ut ex vastissimis ruderibus quàm primùm as-
surget, promptam & fortem manum porrexit;
vitamque suæ olim altrici charissimæ, à qua vitam
acceperat, magno cum fænore reddidit. Quod si
parem voluntatis memoris significationem plu-
res eiusdem domus antiqui alumni imitarentur;
qui hodie & in Ecclesia, & in Regno pulchrè splen-
dent: iam diu paupertatis ingratum isti sæculo
nomen

nomen amisisset. Vnus TYLICIVS post Annæ Jagelloniæ Diuæ Polonorum Reginæ propriam sanctissimis Jagellonibus in suam Academiam, omniq; sæculorum memoria prædicandam liberalitatem, testatus est posteritati, quo animi affectu fuerit in suum illud vetus hospitium, in quod sæliciter diuerterat: vt hæc, quibus tam bene profuerat omnibus, præsidia mercaretur? Nam & viuus nullam propagandi sui nominis dimittebat occasionem; & mortuus, ne quis à se desideraret grati animi monumentum, honestissimi eiusque perpetui effecit census donatione. Quæ autem de ipsa Academia cogitatio? quod consilium? huc omnes opes antiquæ & recentes, huc omnis industria directæ: vt quod magni Radiuili, Macieiouij, Rozrazouij pulchrè cogitauerant, ille sæliciter, ac gloriosè exequeretur. Iltis auribus hausimus & arripuimus illud pondus verborum in aliquo adamante ad immortalitatem sculpendum: VELLE CHARISSIMAM MATREM MEAM ACADEMIAM CRACOVIENSEM, GALLIARVM, HISPANIARVM, ITALORVM ACADEMIIS, & SI QUID EST APVD EXOTICOS IN SAPIENTIA SPLENDIDVM, PAREM FACERE: VT

CIVES

CIVES MEI DOMI HABERENT, QVOD TANTO
SVMP TV, TAM FREQVENTI VITÆ PERICV-
LO FORIS EMVNT. O propriam Episcopi cu-
ram! O seriam boni Senatoris cogitationem! O
ciuis patriæ amantissimi sanctissimam pietatem!
O natam, aut potius cœlo demissam Academiæ
fortunam! Vtinam ingredientem ad nos diuini
luminis radium, subitò exoriens turbo non auertis-
set. Heu quantum regno huic ornamentum abijt.
Successerê mox grauissimarum tempestatum pro-
cellæ ab illis portentis & funeribus patriæ concita-
tæ, quæ in fortunas, patrimonia publica, priuata,
in lachrimas deniq; & sanguinem pauperum, scele-
ratissimâ se obstrinxerant religione, cum summa
generis Poloniæ labe & ignominia. Neque licuit
perturbatâ Repub. illoq; strepitu, & suspicione pe-
riculosissimi tumultus dominâte, de pacis alumnis
quicquam statuere. Sedatis aliquantùm fluctibus,
respirante ciuitate: veritus ne iterum aliqua tem-
porum iniquitas vel partem aliquam suarum cogi-
tationum dissiparet: profert hoc post Academiam
conditam vnum singulare omniq; ætati alendum
beneficium. Cuius ego laudator designatus, cupe-
rem

rem ita contentâ voce proclamare, vt exaudirer ab
omnibus clarissimi huius imperij prouincijs: aut
ita diuiti orationis copiâ affluere, vt illius maiestatis
& magnitudinis vel extrema attingerem. Emitten-
dus hic esset beatissimus aliquis eloquentiæ fluuius;
vt viri tanti altissima æternitatis spacia contemplan-
tem animû pari exequaret plenitudine. Quæ enim
cogitari potest illustrior beneficij amplitudo, atq;
ea donare: quæ cûm omnium seruiant vtilitati:
nunquam tamen à suis possessoribus auferuntur.
Facile perditur pecunia, deflorescunt honores, ex-
cidunt consilia, dissuuntur amicitia: sola virtus, sa-
pientia, & eorum vsus, firma, stabiliaq; censentur.
Perierit ergo pecunia, quam ille frequentissimè in
vsum Reip. tum Regi suo, tum bellatoribus fortissi-
mis offerebat promptissimus: at memoriam præ-
clari nominis sempiternam nulla ætas est abolitura.
Quanquam illam pecuniâ nemo existimat perijsse,
quæ pauperum manibus, afflictorum suspirijs in
cōspectum Dei sublata est: quâ pasti, vestiti, recreati,
vel potius pastus, vestitus, recreatus est in eis Chri-
stus. Ceterûm videte, quanto veri honoris deside-
rio flagrauerit, quanq; sapienter accenderit quem-

que generosum, virorum summorum imitandi studio. Ardebat ipse cupiditate incredibili, relinquendi vitæ in Repub. laudabiliter actæ testimonium: non ignarus, clarorum virorum ocij, & negocij rationem extare debere. Vidit quàm facilè abeat hæc ex quibusque splendidissimis meritis comparata gloria: quamvis enim non effugiat illius oculum, & pondus, qui ex altissimo cœli vertice omnia nostra perspicit: alios tamen ad aggredienda similia non exstimulat. Quid ille egit? Sum (inquit) Episcopus, sum & Senator: in opibus honestissimis per diuinam clementiam, & Reipub. voluntatem constitutus: vtriq; gratia est referenda. Et cùm charitate & misericordiâ nihil esse prius debeat sacerdoti; habeat Nosocomium Cracouiense nouem millia: vt viri pij, & religiosi, etiam me hinc abeunte oleum misericordiæ nunquam deficiens in ægrotorum calamitatem infundant. Pulcherrimum tanè gloriæ solidæ principium in perpetuo benefaciendi desiderio extructum: digna principe, digna sacerdote deliberatio: velle viuens, & moriens non in propinquorum dignitatem, non in superbos luxus, aut vanissimorum monumentorum admirationem:

tionem : sed in miseros, afflictos, vexatōs, voluntatem testari propensissimam. Iam verò senatori prospiciendum est de futuro Reipub. statu, quem cupio esse semper florentissimum : non enim verè amat, qui non semper amat. Quoniam verò constat, consilio, sapientiâ, rerum maximarum tractatione, bonisq; artibus res admirabiles in vrbibus geri; his præsidij diligenter instructam esse vellem hanc sobolem & hanc generosam nostrorum civium segetem. Quippe optimarum disciplinarum cultus, & sapientiæ studium vbi floruerit, opes, honores, virtutes, omnem deniq; fælicitatem ibi florere necesse est : is mihi ad honorum gradus erat aditus, eundem puto iuventuti nostræ aptissimum. Cracovienses præceptores primùm timore Dei me imbuerunt, mores composuerunt, exemplis, & admonitionibus efficacissimis ad omnem me honestatem excitârunt. Neq; me pænivit vnquam huc deflexisse, & Grebsciorum, Mareniorum, Gorsciorum, aliorumq; insignium professorum lateri adhæsisse : nam & miles in acie, & sacerdos in Ecclesia, & Consul in senatu, eas literas, quæ ad humanitatem informare solent, in omnem vitæ meæ vsum traxi.

Non ego puto audiendos, qui nobilem hanc disciplinam, vel puerilem, vel inanem, aut insidiatricem vocitant. Adolescentum quidem sunt præcepta, usus autem virorum, eorumque præstantissimorum proprius: neq; in perniciem alterius dicere, est rectè dicere. At si quid est in me iudicij, fidelissimam hanc voco Ecclesiæ administram, Reipub. reginam, scientiarum omnium ornamentum: hac libertatem nutriri, dignitatem nostræ gentis illustrari vehementer optarem. Ecce & quantum possum, post abeuntem calamitosi temporis asperitatem, iuuo: infero nouum in Academia Cracouien- si surculum, emo decem millibus professorem Elo- quentiæ, qui mea voce loquatur ad iuuentutem, quiq; nouas quotidie submittat copias Ecclesiæ & ciuitati: ipse dum adhuc languentem spiritum tra- ho, suauissimæ parenti hoc offero, vt sit veluti per- petuum meæ in illam pietatis & obseruantiaë do- cumentum: accipite, tollite, & vt quamprimùm hunc meum doctorem audiam, efficite. Quis hîc vel non stupet præ munificentia, vel præ ingenti lætitiâ non soluitur in lachrymas? Solusné fuisti optime TYLICI in ea dignitatis altitudine collo-
catus,

catus, qui vbera huius matris suxeras? solus boni
Academici promotorem in illustri fortuna te me-
mineras? Quid? non sufficere tot labores susce-
pti, tot curæ superatæ, tot factæ contentiones, tot
sumptus effusi pro integritate & ornamentis Aca-
demiæ conseruandis: quorum minimum pericu-
lum maximo tuo periculo auertere paratus fuisti?
Date veniam lurisperitorum consultissimi, & tu,
ex cuius hi bibunt fonte ad vitam formandam in-
stituta, Philosophia: si dixerò TYLICIVM vicisse
pietate, beneficia parentis. Nam si Reges magnos
summâ colimus veneratione, quod ab ijs vitæ isti-
us honestioris ratio, fortunæque nobis aliqua ve-
nerint: si principum in Repub. virorum gratiam
seruamus in mente, quorum beneficio & hæc te-
nemus, & cæteris aucti sumus: si ex nobilitate illu-
strium virorum gratam erga maiores nostros vo-
luntatem in quibusdam monimentis splendidio-
ribus admiramur: si eorum denique autoritatem
reueremur, quorum iudiciis & auspiciis in hac vr-
be amplissima, & in hac Poloniæ luce collocati su-
mus: immensum quiddam est, quod TYLICIO de-
bemus, cuius providentiâ & sapientiâ, hæc omnia re-

recuperauimus, & alia illustriora accepimus. Hoc
nimirum specimen, hoc indicium animi, hoc lu-
men sui Cancellariatus esse putauit, Cracouiensis
Episcopus TYLICIVS: si Academia multò maio-
ra, quàm acceperat reddidisset. Cōdatur hoc iam
cum sarcophago, ACADEMIÆ SE QUIDQVID
ESSET DEBERE: hoc verò viuat & regnet; in
omnibus statuis, tabulis, imaginibus, scribatur, no-
tetur, exprimatur: TYLICIVM EPISCOPVM
CRACOVIENSEM FVISSE SEMPER PATRO-
NVM, CONSERVATOREM, PROTECTOREM,
AMPLIFICATOREM DIGNITATIS ACADE-
MICÆ. Satin' fuisse? etiam fore perpetuum. Tan-
ti enim æstimamus vel hoc vnum instaurati elo-
quentiæ studij beneficium, vt per illud solum im-
mortalitatem quandam consecuta videatur. Vi-
dere iam videor viros potentiâ animi & corpo-
ris confirmatos, ingenij, & doctrinæ opibus in-
structos, qui laudatissimorum suorum progenito-
rum, & suam ipsorum matrem optimis studijs, &
honestissimis moribus commendabunt, & ad pri-
stinum splendorem honoris, famæ, dignitatis in
foro, Senatu, Comitijs, omni denique loco vin-
dica-

dicabunt: atque vbi in subsellia maiorum suorum,
in loca honoratissima, magnis virtutibus subnixi
ascenderint, gratiâ & beneuolentiâ fouebunt, te-
stimonijs amplissimis ornabunt, & ijs demum,
qui ex se nascentur, cum sanguine statim amorem
tuæ educatricis transmittent. Atq; sic diuina sapi-
entia TYLICH cum magno coniuncta animo, per-
petuâ seculorum serie celebrabitur, nobiscum ver-
sabitur: illam Deo fauente in iudicijs personantem,
in Academia frequentibus auditoribus concio-
nantem: illam pro innocentia pugnare, de com-
muni bono differere, voce pastorum pestifera re-
ligionis monstra territare, virtutes inserere, vitia
extirpare, in ciuium consuetudine vigere, amicitias
colligere: illam denique in multorum vocibus,
linguis, sermonibus, animis, actionibus, cum im-
mortali sui conditoris gloria, viuere aspiciemus,
audiemus, mirabimur. Nec mirum immortalem
illius fore vitam, quæ à tanto animi splendore na-
ta est. Quis enim ita mentis cogitatione penetra-
uit maximam huius nostræ Reipub. necessitatem?
quis tam prudenter imitatus est ingenium gentis
Polonorum? Libertate illa à multo tempore glo-
riatur;

natur; eius studij cultum induxit TYLICIVS, quâ
excitari, augeri, conseruari, splendere libertas po-
tuit. Hæc enim vna è maximis disciplinis est, posse
dicendo tenere hominum cætus, mentes allicere,
voluntates quò velis impellere, vnde velis deduce-
re: hæc, inquam, vna in omni libero populo, ma-
ximeq; in pacatis tranquillisque ciuitatibus præci-
puè semper floruit, semperque dominata est. In
nostra verò patria, quid ita vtile aut splendidum,
vbi legum æqualitas vniuscuiusque virtuti campum
aperit ad summos honorum gradus consequēdos?
Vt enim inter homines eiusdem naturæ, præstan-
torem esse oportet, quem maiori reuerentiâ di-
gnum iudicamus: sic in nobilitate paris ordinis &
libertatis, multò excellentioris esse creditur, cui in
clarâ hominum luce, honoris præstantia fuerit at-
tributa. At quo ita dignitatis tuæ splendor, Regis
illustriumq; virorum iudicia feriet; si nō eloquen-
tiæ dicendiq; facultate? cuius propriæ sunt artes,
fidem & existimationem conciliare, in Regum sa-
pientissimorum benevolentiam interioremq; con-
suetudinem influere, quoque fueris in orationis ap-
paratu copiosior, eò & gerendis maximis dignita-
tibus

ribus aptior. Tanta enim est admiratio copiosè,
sapienterque dicentis; quem qui audiat. intellige-
re etiam, & sapere plus quàm cæteros arbitratur;
neque vllum existimat honorem esse tantum, quo
ille veluti cælitùs in salutem hominũ demissus pro
dignitate possit exornari. Quid enim est tam ad-
mirabile (vt inquit orator) aut tam iucundũ, quàm
sapientibus sententijs, grauibuscq; verbis ornata, at-
que polita oratio? quid tam potens tamq; magni-
ficum, quàm populi motus, iudicum religiones,
Senatus gravitatem, vnius oratione conuerti? quid
denique adeò regium, aut liberale; quàm opem fer-
re supplicibus, excitare afflictos, dare salutem, li-
berare periculis? Huius præstantiæ viri, quoties
apud nos enituerunt, qui vehementiori dicendi vi-
seditiosorum hominum impetus, aut conatus re-
primere, qui authoritate, qui fide, qui iustitiâ, ma-
gnitudine animi, consilijs multitudinem tenere
potuerunt: ij graues, ij principes, ij duces, ij auto-
res omnis dignitatis atq; imperij habiti sunt. Nu-
meremus Orichouios, Herburtos, Karncouios, My-
scouios, Patricios, Solicouios, Macieiouios, Mele-
cios, Zamoscios, & cæteros viros clarissimos, quo-

G

rum

rum diuinà oratio non contenta finibus patriis, eti-
am in clarissimis exterorum regionibus regnat, in
magnamq; opinionem excellētiae regnum hoc flo-
rentissimum vindicat. Nempe liberorum hæc fuit
semper propria possessio: in oppressis à seruitute
ingenijs, nunquam suum lumen ostendit. Si quæ
enim scintilla generosioris animi, si quod honesti-
oris istius disciplinæ signum se prodidit; simul atpe-
ctum & extinctum vel obscuratum fuit. Sublato
enim virtuti ad gloriam stimulo: crescere ad glori-
am vbertas orationis non potest. Quorsum prodest
disertum, aut eloquentem esse, si quod sentias, li-
berè, & cum dignitate, non licet eloqui. Nostris
verò ciuibus, cùm simul cum libertatis studio, in-
nascatur ad cultiorem doctrinam quædam amabi-
lis propensio: eaque sit Reipub: forma; vt cuiq; ex
actionibus honestis liceat celebritatem nominis
colligere: hunc ingenuum, hunc indole præditum,
hunc satorum claritate non indignum conclamant
omnes, qui in familiari sermone, venustum, & in-
geniotum quid ex antiquitatis notitia deprompse-
rit: cuius docta ratio & admirabilis oratio in fre-
quentioribus conuentibus auctoritatem sibi fece-

rit.

rit. Adhucné dubitamus TYLICIANVM hoc ad
posteritatem monumentum, à magno sapientissi-
mi & amantissimi patriæ ciuis animo conditum
esse? Nam si non murus, arces, propugnacula,
urbium aut Rerumpublicarum nomina tenent, ve-
rùm ipsi ciues viri fortissimi: cogitate quanta men-
tis altitudo, quam præclara in patriam voluntas
prodijt huius viri, qui ne aliquando hæc materia
commoda ciuitati nostræ deesset, tantâ curâ &
prouidentia prouidit. Neque enim Grammaticæ,
Dialecticæ aut Rhetoricæ præceptis (vt nonnul-
li faciunt) concludi existimauit perfectionem elo-
quentiæ; sed cum magno semper Oratore sensit:
Nostra (inquit) est omnis ista doctrinæ pruden-
tiæque professio, in quam homines quasi vacuum
abundantes ocio, nobis occupatis inuolauerunt.
Rhetorum est officium de iustitia, de ciuitatibus
instituendis & regendis, de omni viuendi ratione,
deniq; de abditissimis etiam naturæ causis differe-
re. Quò magis miror, potuisse venire in mentem
summis quibusdam nostro sæculo ingenijs, literas
humanitatis præparare solummodo ad maiores di-
sciplinas: in his enim ars illa continetur, quæ eru-

dito, ingenuo, & eo, qui in Repub: velle excellere
digna est: quæq; rerum omnium, quæcunq; in vi-
tam cadere possunt, præceptionem & vsum habet.
Ideo ridiculi sunt multum, qui studium humanita-
tis se iam percurrisse & contecisse inconsideratè lo-
quuntur. Scilicet versiculum concinnè, aut epi-
stolam non ineleganter, vel oratiunculam cum ali-
quo apparatu scribere aut proferre: est vel medio-
criter disertus. Erras nimium; nisi Poëtas quosque
præstantissimos, oratores grauissimos, historicos
disertissimos pellegeris: & nisi scribere aut dicere,
quotidie maius esse tuis humeris iudicaueris. Quò
enim quis magis in hoc studio proficit, eò scri-
bendi & dicendi labor grauior esse videtur. Nem-
pe vt excellentes pictores, qui soli bene iudicant,
in quo sita sit imaginum perfectio, maiori quiete,
diuturniori meditatione, pertinaciori labore opus
habent: sic qui orationis illud decorum optimè
tenent, tantò magis & in dicendo exalbescunt,
& in exercitationis studio, cogitatione se fatigant.
Scribendi enim rectè non principium, & fons (vt
quidam dixit) sed argumentum est consummatæ
sapientiæ. Quàm cuprem multis parentibus
cum

cum errorem eripere, qui leuem triuij cognitionem, in magna satis eruditionis opinione numerant. Nonné vestrae sunt partes, ô viri nobiles, in Republica de rebus maximis cum dignitate deliberare? non vobis incumbit leges ferre, latas conseruare? de bello, de pace decernere, legationes gloriosas obire? & hoc ex leuissimis Grammaticorum præceptiunculis haurietis? audite iudiciũ huius magni Episcopi, intueamini exemplum. Bono Ciui (dicebat ille) quandoquidem in luce elegantiorum hominum versatur, quæcunque in vitam veniunt, quasita, audita, lecta, disputata, tractata esse debent. Præiuit exemplo: vidimus enim in illum ornandum omnes præclaras scientias, omnes istas literas ciuiles conspirauisse: quid ille in Cicerone non vidit? quid in Demosthene non legit? quid in Plutarcho, Xenophonte, Lilio, Tacito, quid in vtroque Seneca, & alijs quibusq; lectissimis autoribus non annotauit, memorię non consignauit, vsu non confirmauit? Omnino omnia eum legisse oportebat, qui aliquando iucundissimos cū eo sermones de bonis literis facere voluit. Ecce qui omnium vestrum filios, vt proprios ama-

uit propter Remp: videte quibus studijs, artibus,
exercitijs instructos cupiat ad honores gerendos
accedere. Fatebitur iam non nemo; præclarè de Re-
pub: meritum hac sapienti liberalitate optimum
hunc Senatorem: at fortè è medijs Academiae spa-
cij prorumpit nouus aliquis disputator, de Repub:
inquiens, concedo: at de Academia, vbi non tan-
tus est vsus vestræ istius delicatæ orationis, nego.
Nouam petis arenam, vir bone; sed ego ex eodem
theatro rem expedio: neq; enim litem ex litibus se-
rere conuenit eum, qui studia sanandorum & pa-
candorum animorum profitetur. Esto, vt dicis:
Si te Academicum ex illa veterum, aut recentio-
rum Academia prodis: si Scholæ huius inclitæ ci-
uem te esse iactas, mecum te oportet sentire. Non-
ne sanctissimi Reges ad Rempublicam iuuandam
& amplificandam nos acciuerunt? nonne poli-
endos, formandos, & vndiquaque ornandos no-
uos istos ciues nobis commiserunt? Si ita est, vt
dubitare non potes, profectò indecòrum erit no-
stris solummodo literulis, aut commoditatibus in-
dulgere: communis boni, quod nostræ fidei, auto-
ritas Pontificum, & Regum benignitas, Senato-
rum

rum amplitudo credidit, obliuisci. Imò si sapimus,
liberalitate TYLICII orbis Academici dignitatem
illustriorem factam esse confitebimur. Cuius enim
scientiæ, non singulare quoddam ornamentum
adijcit eloquentia? Philosophia tum demùm re-
gnare, libertateq; suâ frui dicitur; vbi detergâ bar-
barie, sublata obfcuritate, in generosas discentium
animas, simul cum quadam facilitatis voluptate
influxerit: nihil enim præclaro isti Dei immorta-
lis dono, tam inimicum, vt sordida, & lutulenta
oratio. Vultures quidem fœtoribus delectantur,
odorem fugiunt; at auium nobiliores, elegantissi-
ma & fragrantissima quæq; pabula petunt. Fortè
legum periti istas verborum quisquillas recipient?
minimè vero: hi enim vt sunt magno & excelsa a-
nimo, turpe putant cultu dictionis neglecto, splen-
dorem vitæ politicum appetere. At saltem Theo-
logi hanc loquendi sollicitam curam contemnent,
quorum est maximè; res serias tractare, vt quæ æter-
nitatis momentum respiciunt? Sed neq; hæc no-
bilissima facultas sui argumenti maiestatem, vult
fœculentâ sermonis immunditie contaminare:
imò cùm suū esse munus iudicet pro religione pu-
gnare,

gnare, ad virtutes cohortari, à vitiis abstergere, rerum vbertate, orationis copiâ, tenendorum animorum peritiâ, eloquentiæ denique ministerio, vitam decusq; suum omne creuisse libenter confitetur. Video adhuc scholasticorum subtilitatem quosdam obtrudere, quasi solâ contemplationis pulchritudine contenti, nostram hanc dicendi artem nihili faciant. Hospes es in antiquitatis cognitione, si ignoras scholasticorum præstantiam ex Rhetorum officinis prodijisse: quære ex Tacito, consule Senecam, audi Plinium, & quem ego instar multorum pono Hieronymum, horisontem illum Ethnicæ & sacre disciplinæ; is te proculdubio docebit: disertissimum quemque ob ingenij eleganciam & vberioris doctrinæ laudem, appellatum fuisse Scholasticum. Dicent & alij: Scholasticè dicere nihil esse, quàm rem aliquam oratoriâ methodo explicare. Qui ergo sit splendor cuiusque scientiæ, detractâ dicendi facultate, vides: Aristotele nemo doctior, nemo acutior, nemo in rebus vel inueniendis, vel iudicandis acrior extitit; hic tamen omnium ætatum consensu, omnium eruditorum autoritate, aureus eloquentiæ fluius,

uius, summo ingenio, scientiâ, copiâ fuisse perhibetur. Plato Philosophorum quoque Princeps, princeps ingenio, princeps occultissimarum artium cognitione, idem simul grauitate dicendi, & in rebus ciuilibus prudenter sapiendi princeps: cuius neruos, copiam, splendorem, expressit præstantissimus apud Græcos orator, discipulus illius Demosthenes. In iure ciuili, si quis diligentius contempletur Iustinianos, Trebonianos, Theophilos, Papyrios, & illam frequentissimam excellentissimorum virorum coronam, ibi primùm crediderit ortam fuisse orationis dignitatem, ibi educatum & consummatum; quidquid in hoc nostræ dictionis cultu splendet pulcherrimū. Quemcunq; enim horum acceperis, in dubio est animus, elegantissimusné an eloquentissimus sit iudicandus. Ipsi illi, qui omnia voluptatum lenocinia vt sterco-
ra conculcant, omnemque istum exteriorem corporis ornatum abijciunt, ita in omni dicendi genere regnant, vt quiduis potius eis, quàm sermonum aut exultæ orationis gloriam eripueris. Quis purior Gregorio? quis Augustino acrior? quis Basilio ingeniosior? quis denique illo rege Oratorum,

H

quot-

quotquòt erunt aut fuerunt, scientior, vehementior, admirabilior; illo (inquam) Ioanne Antiocheno, verè apud omne sæculum appellato Chrysoftomo? Viderunt hoc nostræ ætatis eruditi, & quasi puderet paternarum sordium, totos se ad vindicandam orationis dignitatem conuerterunt. Habemus illorum beneficio, non illam modò de moribus, sed hanc quoque admirabilium causarum veteri splendori restitutam Philosophiam. Inde Contareni, Vicomercati, Scaligeri, Fonsæcæ prodierunt: inde in iudiciorum subsellijs, imperatorum palatijs, scholarum exedris, Alciati, Cuiatij, Giphanii, Mureti apparuerunt: denique Soti, Banesij, Bellarmini, Suaresij, & eiusdem ordinis alij viri diuini, quorum pietatem & sapientiam vterque orbis terrarum admiratur. Quis ergo ibit inficias, hoc artium humaniorum æquor, vltra Orientis & Occidentis terminos, vltra ipsius cœli plagas imperium extendisse; si res illæ cœlestes à natura & gratia mirificè conditæ, in quibus cognoscendis ipsa cognitionis acies hebetatur, tantà cum facilitate & grauitate explicantur? Eant igitur qui amplissimis Regnis, aut maximis imperijs erectis, in potestatem

statem redactis, aut expugnatis, gloriantur; si frustra erigas, constituas, aut potentiâ tuâ perdomes ferocem populum, nisi ab eloquentiæ studio, fidem colere, iustitiam retinere, alijs æquo animo parere, labores pro communi vtilitate suscipere, pro gloria publica dimicare, dulce ac decorum didicerint. Quorum bonorum præstantia, cùm auctori TYLICIO sit referenda, cur non congratulamur summæ ipsius virtuti, quæ iam tulit, & fert quotidie meritorum suorum fructus amplissimos? cur non inter summos viros imaginem illius collocamus, patrem patriæ scribimus? cur denique illustrium Episcoporum gloriam, quæ maximè suâ putat interesse; Academiam pulcherrimis disciplinis reddere florentissimam, non appellabimus? Tu verò maximè generosissima Polonorum soboles, in venerationem tanti benefici totam te effundere, tota in admiratione maximarum virtutum consistere debes. Omnes enim vitæ gradus, omnes actionum laudatissimarum cursus, vt aliorum præstantissimorum virorum; ita huius optimi Senatoris, tua sunt propria exempla, tuæque consecrata imitationi; vt ex his corporum & animorum di-

gnitatibus, edas aliquando boni ciuis pulchrè sur-
gentem imaginem: quæ post gloriosos in terris la-
bores, rectissimâ in cœlum viâ ascendat, atque suo-
rum factorum iustissimo præmio iucundissimè
perfruatur. Quæris quæ sit ista? Tenere animum
in officio, ne rem diuinam corpori tuo inclusam,
vbi vbi es aliquâ vitiorum labe conspergas: putare
te in conspectu supremi iudicis semper esse, qui ali-
quando facturus est tecum strictissimam de singu-
lis factorum tuorum momentis rationem: literas
diligentiùs colere, & orationi poliendæ, historiæ
cognoscendæ vacare: sapientum de moribus præ-
cepta in vita ostendere: post honorem Dei ad di-
gnitatem referre omnia: illum demum cogitare
esse rectissimum Politix vsum, qui diuinæ rationi
maximè fuerit consentaneus. En ad eam rem penes
me arma, & præsidia ponuntur: autoritas est eo-
rum, qui hoc iucundissimo aspectu te recreârunt.
Neque arroganter de me quidquam dictum velim:
non enim existimaui vnquam in pectore meo tan-
tùm literarum, virtutis, exemplorum situm esse,
vt tuæ necessitati sufficeret: illorum fidei factæ
confido, qui mihi sponsonem affuturæ gratiæ
diuinæ

diuinæ fecerunt. Enimvero licet ego tantorum
donorum sim indignus; digna tamen erit ista ani-
morum tuorum indoles, per quam plurima quæ-
que & maxima Dei beneficia in Ecclesiam & in
Rempublicam, quorum vtilitati & ornamento
crescis, inferantur: digna & magnanimi TYLICII
in patriam, & in Academiam voluntas, quam
Deus Optimus respiciat, & maioribus in dies acces-
sionibus pro sui nominis honore amplificet in
omnem posteritatis æternitatem.

D I X I.



1 X 1

BIBLIOTH. UNIV.



JYVÄSKYLÄ



